

張文襄公奏議

張文襄公全集卷五十

奏議五十

裁汰冗員摺

光緒二十五年正月十六日

竊照前於六月內欽奉上諭將候補分發捐納勞績等項人員嚴加甄別裁汰等因欽此嗣於八月內欽奉慈禧端佑康頤昭豫莊誠壽恭欽獻崇熙皇太后懿旨仕途冗雜奔競成風非激濁揚清不足以昭懲勸等因欽此伏查候補人員過多最爲吏治之累鑽營者妄爲而生事樸拙者被擠而困窮有才者乏見長之方年深者無循資之望以致營營擾擾求缺求差絕不知安分

之可貴干求之違法殊於政體有礙自非認真沙汰不足以澄清吏道分別賢愚且疊次欽奉懿旨諭旨飭令嚴加甄別裁汰尤應欽遵切實查辦除貪劣不職者臣當隨時考察據實奏參外現經督飭兩司將通省候補人員切實清查茲據查明歷年奉差不銷久假不歸潛行離省私自回籍者應卽咨明吏部不准再來鄂省候補其病故未報者咨部除名以上正佐共計一百二十員此外又查有在本省候補得缺與例不甚相合多有違礙而該員不免意存推宕掩飾猝難查得確據者已飭司暫停其補署差委於是此項人員紛紛自行離省

回籍此項共計五十餘員以後仍當督飭兩司隨時清查裁汰以期漸次疏通

上諭張之洞奏遵旨裁汰冗員一摺候補人員過多奔競鑽營最爲吏治之累該督所奏甚得綜核名實之要著各督撫一體查照辦理以杜冗濫而清仕途該部知道欽此

復設巡撫到鄂送交關防片

光緒二十五年三月初七日

再前因湖北巡撫裁缺所有巡撫關防經臣奏明交解京餉委員赴部賚繳嗣因欽奉懿旨復設湖北巡撫仍將關防收回封存臣署茲新授湖北巡撫臣于蔭霖到

鄂臣當將封存之巡撫關防并王命旗牌暨文卷等項
委員賈送撫臣接收任事

硃批知道了欽此

請將岳常澧道移駐岳州摺

光緒二十五年五月
初四日

竊照湖南岳州府現在欽奉諭旨開設通商口岸事屬
創辦舉凡稅務商務及華洋交涉事件在在均關緊要
自應查照各洋關成案設立關道督辦以專責成查分
巡岳州等府之岳常澧道原駐澧州與岳郡地隔重湖
既恐鞭長莫及然若另行增置又復糜費滋多臣等往
復相商擬請將分巡岳常澧道移駐岳州兼管岳州關

監督事務所有一切通商開埠事宜得以就近經理可免增設之煩雖與原駐之澧州相距稍遠然岳澧二府州均係該道轄境今茲遙領澧州與前此遙領岳郡情事正復相同而權衡輕重今日之岳郡爲新開通商口岸華洋交涉事務殷繁較之澧州尤爲重要如蒙俞允移設其興造道署稅關添設委員巡捕各事自當督飭該道妥爲籌議漸次舉辦隨時奏陳應請敕下禮部鑄造岳州關監督之關防一顆祇領開用以昭信守

硃批著照所請該部知道欽此

查明招商局保借洋款擴充萍鑛有益無礙摺

光緒

二十五年六月十七日

竊照承准軍機大臣字寄光緒二十五年四月初二日奉上諭有人奏大理寺少卿盛宣懷辦理江西萍鄉煤礦鐵路以招商局洋涇濱各產抵保洋行借款請飭查禁等語萍鄉煤礦前據張之洞等奏陳開辦情形並無抵保借款之說若如所奏因萍鄉一隅之礦輒以招商局各產抵保殊屬有礙大局著張之洞詳細查明卽行知照盛宣懷毋得輕許致滋流弊是爲至要原片著鈔給閱看將此諭令知之欽此臣查各國自強之道不外鐵路輪船槍礮數大端皆以鐵廠爲根基而煉鐵煉鋼

尤以得佳煤煉焦炭爲先務湖北前經奏開鐵廠徧覓
煤礦不得佳質後經臣訪獲江西萍鄉煤礦最合煉焦
之用厯年臣飭鐵廠購用不少實爲鐵廠化鐵煉鋼造
軌之根本因路僻運艱故未能盡量采購多開爐座上
年三月間經督辦鐵路大理寺少卿臣盛宣懷會同臣
奏明購用機器築路設綫派員總辦力籌大舉並按照
開平禁止商人別立公司及多開小礮擡價收買以濟
廠用而杜流弊仰蒙俞旨欽遵在案蓋開礦不用機器
不能深入得佳煤煉焦不用洋爐不能去燐成佳鋼運
道不用鐵路輪剝不能濟急用而輕成本目前造軌將

來行車需用煤焦皆屬極鉅路廠與萍鑛互相聯屬皆爲杜塞中國漏卮要舉至輪船招商局每年用煤爲出款大宗上年因開平煤不及接濟多購洋煤虛糜二十萬金以故竭力籌辦萍煤至今已用銀五十萬兩左右係由湖北鐵廠認股二十萬鐵路總公司輪船招商局各認股十五萬均以其相需甚殷也現在每日出煤二三百噸運道節節艱阻所運不敷所用必須先由鑛山造鐵路一條至萍鄉河口由湘潭至漢口置造輪剝各船使每日可運數千噸足供鐵廠輪船車路之用然後路廠可相持不敝招商局亦受其益而萍鑛得可恃之

銷路卽操獲利之券但購辦機器營造鐵路輪剝需款至繁事當未成利尙有待華商之股未易立時招集盛宣懷當因機器各件多由德商禮和洋行墊購爲數已鉅故與該行議借四百萬馬克分十二年攤還統由萍鄉煤礦公司商借商還惟向來借用洋款必須給以辦鑛事權並須分得鑛中餘利此次盛宣懷議明萍礦仍歸自辦僅給借息七釐彼旣無辦鑛之權又無餘利可得不得不照商例切實保借因將招商局產業以爲作保之據當經議訂借款合同分別咨呈總理衙門路礦總局核准存案此盛宣懷以招商局保借禮和洋款擴

充萍鄉煤礦辦法之情形也臣此次欽奉寄諭當將此項借款每年還款本利共須若干是否以招商全局各項產業抵押抑止上海洋涇濱一處棧房產業作保現在全局各項產業共值銀若干洋涇濱一處產業值銀若干至抵押與作保有何區別設將來借款本利萬一無著洋商能否將全局占踞管理有礙大局各節向盛宣懷詳細咨查旋准咨覆並詳考案據查借款合同載明招商局允保禮和墊款四百萬馬克息本其息本未還以前不將上海洋涇濱南北地皮棧房產業出售或抵押於人等語實係招商局僅止作保並未將產業抵

押且止上海洋涇濱一處機房產業作保並未將全局各馬頭及輪船作保查光緒十一年向旗昌洋行贖回招商局之時因無款可籌曾將全局各馬頭輪船按照商例抵押與匯豐銀行其時經律師將各項地契船照均繕押契赴英領事衙門過立匯贊行名至光緒二十一年還本清楚始收回各契據仍易招商局戶名係屬洋商抵押之一定辦法現借禮和之款止有合同載明作保字樣並未將地契交給亦未赴領事處過戶是招商局產不作抵押之明證又光緒二十四年商局結帳載明全局馬頭輪船機房各項資本六百八十六萬兩

其中上海洋涇濱南北中棧房產業值本一百六十八萬八千兩以保禮和借款係專指此項洋涇濱棧房產業是並未將全局資本作保之明證至於抵押與作保區別之處查抵押則產業已屬於人作保則產業現仍在我現在不過由招商局作保設將來借款本利無著應先將所借禮和四百萬馬克購辦之煤礦機器鐵路等物以及該煤礦公司自己股本五十萬所辦之礦產各物盡其所有以歸借款必不致將招商局保產作抵如煤礦公司各物不敷還款再由保人如數補足賠還了事如保人不能將欠款賠補始將合同內所指作保

之產業變價補足此作保不能遽抵之明證茲查禮和
借款前三年不還本後十年每年攤還四十萬馬克約
合銀十三萬兩左右預計此鑛三年後每日至少出煤
一千噸一年出煤三十萬噸每噸提銀五錢已足敷歸
還本利就使意外之變出煤無多該煤鑛尚有股分及
借款所置鐵路機器各項產業不難作第二次借款爲
借債還債之計就使該煤鑛及鐵路機器各項產業不
足抵償而所短之數已屬有限鐵廠鐵路公司輪船公
司應照商例按股攤賠至多不過數十萬兩斷不致將
作保之洋涇濱產業爲彼所占更不能將全局占踞管

理此又臣查明盛宣懷保借洋款不難籌還與招商局無礙之情形也查該少卿盛宣懷此次以招商局保借禮和洋款實因商股一時難集而萍鄉煤礦所關於鐵政甚鉅不得不力圖其成核計借款本息每年止攤還十餘萬兩爲數不鉅必能清還盛宣懷綜核素精斷無將成本數倍借款之商局送與外人之理恭繹此次諭旨原只戒其勿得輕許作抵致礙大局然則此事之有無流弊應否阻止自以於招商局是否有礙爲斷體察合同辦法情形實與招商局並無妨礙且此事既經各明總署及路礦總局均經核准有案而洋行久經訂立

合同既與招商全局無妨似不必另起波瀾致外人別
滋口舌合無仰懇天恩仍准以此款擴充萍礦不獨於
鐵廠有益而地產工作日盛一日於萍鄉小民之生計
裨益尤宏現仍一面招集商股辦理擬有章程並當多
留鑛股專待江西商富附入以示公享美利之意計股
票擬定一百萬兩鐵廠及鐵路公司並輪船招商局入
股五十萬兩其餘五十萬兩由盛宣懷將章程股票咨
送江西巡撫藩司就地招股如有不敷再向他省招集
其所認股分限六箇月繳足以免觀望貽誤如此辦法
盛宣懷肩借款之難任開鑿洗煉修路轉運之勞而江

西商富享入股獲利之逸有盈則江西商富分一半之利無效則盛宣懷一人還全數之款似亦極爲平允所有遵旨查明招商局保借洋款辦理萍鄉煤礦並未輕許抵押不致有礙大局且實有益萍民生計各情形理合恭摺據實覆陳伏祈聖鑒
硃批知道了欽此

驗收蘆漢幹路蘆保首段工程並趕辦全路情形

摺光緒二十五年八月三十日

綱蘆保一段工竣開車臣等於光緒二十四年十二月初二日馳電奏報在案半年以來所有尙未全復之橋

梁車站各工亦已次第歲事臣宣懷於八月初十日由上海埠輪前赴天津與裕祿籌商一切卽於二十五日馳至蘆溝橋順軌西行以達保定察見土工橋工密實堅固鋪設軌枕安帖不浮裝配車輛位置車站亦皆合法京津迤東地瀕海洋機輪殊形工作新製士夫毗庶久稔見聞近道多年羣焉相習京西直入腹地耳目隔絕塞而未通此次創興大工華洋員匠絡繹載道制防調護視風氣已開之區艱難倍蓰勞費均增猶幸朝廷爲百姓經營樂利之意隨時宣諭深入人心輪轂風馳便利日著都人士女舉有欣欣之色誠中土由塞而通

之氣象卽地方由貧而富之樞機也至幹路全工照比
約所載應自光緒二十四年五月借款簽定合同之日起計日程功惟上年因息借英法兩國款十六兆鎊合同有禁止一年之內不得另有中國他項債票在歐洲印度印賣之條故比國公司候至本年四月始印賣蘆漢鐵路借票陸續滙交應用遲滯一年初非原議時意料所及至蘆保工程得以首先告竣漢口至濁口石隄亦克完工皆資部款開辦幸不虛曠歲月查幹路難工以南端首段爲最漢濁一帶外江內湖武勝關一節鑿山開洞施工遲速不可以平地相提並論本年春夏間

卽商令比國工程司沙多將燭口至信陽一大段畫分
四小段每一段一百二十里各分設工程處測勘綫路
算繪各圖現在第一段土工及橋座底柱工皆完備其
餘三段同時並舉購地年底全完土工橋梁底柱年內
外全完約計明年九十月間信陽全段工程可以告竣
此南段路工趕辦情形也保定至正定二百六十里路
綫勘定各圖亦已完備購地約得其一半明春全段土
工告竣現就定州已成土方段內鋪軌運料以次開辦
橋梁各工約計來年夏月保正全段完工蘆保之西可
達正定此北段路工趕辦情形也大抵營造鐵路以勘

路之工爲基址每勘一路必分三次勘至三次全圖均
出水綫已平築土造橋思已過半比款未定之先臣已
節次派員察勘全路比公司承辦後卽接辦漢信保正
第二三次勘路工程目下又選派華洋員司接勘黃河
南北岸兩段第二次一俟辦畢再接勘第三次計明年
漢信保正兩段完勘已成一千里其時中段路工亦可
得三分之二工頭夫匠教練諳習地勢平坦駕輕就熟
信陽正定兩路通車南北材料運送便捷因易見遠據
沙多稟稱由黃河南至信陽北至正定兩段二年告成
可操左券除黃河或先造船過渡或暫建木橋通車大

橋工程不計外算至全路告成閱時三年有半但期無意外阻礙當不致有曠日持久之虞堪以仰慰宸廑下紓憂負

懇請飭撥各省欠款片

光緒二十五年八月三十日

再蘆漢鐵路議准撥借部款一千萬兩又南北洋官款撥銀三百萬兩爲建造鐵路立備行車各事已於上年夏間由戶部先撥之四百萬兩連同南北洋官款支用垂盡於六月奏請續撥仰蒙飭下戶部劃撥各省昭信股票銀三百萬兩陸續解收外計江蘇廣東欠解最巨江西福建黑龍江湖南亦有蒂欠共計短銀八十九萬

餘兩伏查此時需款甚殷既與比公司訂明自備資本若干未便爽約合無仰懇天恩飭下戶部將蘇粵等省已撥未解之款另行籌撥俾供要需不勝迫切之至硃批着戶部另行籌撥欽此

黃河南北兩路擬派總辦兩員片

光緒二十五年九月十五日

再蘆漢幹路延長二千四百華里卽遍較歐洲各國大軌路亦稱巨擘中間以黃河天然分界道里略均營造之任似非一人所能收效擬就黃河南北分作兩路趕造派總辦兩員以專責成北段擬派直隸候補道孫鍾祥南路擬派江蘇候補道鄭孝胥經理俾收指臂之助

伏乞恩准

校閱近省各營並操演防營行軍隊摺

光緒二十五年十二月

月二十

四日

竊臣前奉諭旨查閱湖北營伍當因上年湖北正值奏
裁綠營兵額之時籌辦工賑尙未竣事又以有鄂省鹽
釐抵還洋款之舉一切籌措未能就緒奏請展緩出省
校閱奉旨允准在案茲臣仍因諸務繁重緊要一時尙
難出省當將督撫兩標武昌城守漢陽協等七營官兵
調齊並調近省之黃州蘄州兩營及向係調操之德安
興國兩營自副將以下及都司守備千把外額之汎地

可暫離者並挑選能放洋槍兵丁隨帶至省臣於本年十二月十七日起連日校閱各官弁騎射打靶及各兵丁洋槍技藝省營中靶在八成以上外營中靶在三成以上又於二十一日調集督撫兩標及漢陽協練軍並護軍營武燈營武防營武功營升字營各防勇至距省三十里青山一帶地方操演行軍隊查方今練兵以洋操爲最精細而洋操尤以行軍隊爲最有實際既可驗軍士之強弱又可考將領之心思兼可練習測量地勢趕作溝壘等事迭飭各將領認真講求茲經臣親加校閱並令洋教習布置一切隨隊察看兵勇俱屬強壯部

伍亦甚整齊並由洋教習將各營分作兩隊一爲攻軍一爲守軍互相比校各軍於攻守進退之間尙能悉聽調度其施放槍礮以護軍營最爲純熟不亂以及工程營之趕造橋壘安放地雷轍重隊之運致軍資等事皆能合法其餘各營其中亦有可觀惟此係初次合操行軍隊內中各營生熟自難一律緣各營兵勇今年有彈壓鐵路者有填築本營操場者有修造本營營壘者不能日練洋操此時若不一氣練成則閱伍旣過又復鬆懈終難入格現經臣嚴飭各營將領于限一箇月上緊操練行軍隊俟明年二月臣當復行親加校閱再將操

練出色及生疎疲緩各官弁兵勇比較等次分別賞罰
果能從此切實訓練勤密不懈當可漸收實用臣仍當
隨時督飭考校以期仰副 聖主整軍經武之至意
硃此知道了著卽勒限上緊操練行軍隊復加校閱據
實奏聞欽此

湖北認定抵款實數請敕部詳核通籌摺

光緒二十五年

十二月二十九日

竊照湖北宜昌鹽釐前經戶部奏准咨行自光緒二十
四年起抵還洋款一百萬兩由部另行指款撥補鹽釐
一百萬兩核計光緒二十四年分撥補百萬款內有指

撥本省之裁兵節餉一款實只扣存五萬餘兩丁漕平
餘一款除欠緩及完銀者無收外實止收銀二萬五千
餘兩尙短八萬五千餘兩將本年奏准部撥湖北昭信
股票銀十萬餘兩撥出八萬五千餘兩湊足上年撥補
百萬之數至本年撥補之數無著太鉅經年以來一面
與稅司辯論一面支持餉需一面與戶部電商騰挪牽
補於緊要各飭勉強解出然照此情形實難持久要餉
有誤鄂省固難當其咎洋款懸宕稅司亦必纏繞不休
且往復劃扣膠葛太多官吏核算數目每致昏眩淆訛
籌款之難更可知矣臣等督同司道詳核熟籌謹將鹽

釐實收款抵還款撥補款鄂款江款分晰各項年分數
目籌擬以後辦法敬爲 聖主臚陳之一本年撥補無
著之款太多也查光緒二十五年分撥補百萬款內計
指撥外省各款四十萬兩本省各款六十萬兩前次查
明本省外省無著者共七十餘萬兩經臣等奏請由部
另行改撥旋准部覆止准撥本省昭信票十萬餘兩然
以湊抵上年撥補百萬之數止餘存銀一萬五千兩爲
數甚微難資補苴復經督飭司道詳加核計有著者仍
止三十七萬兩茲計本省無著之款如裁兵節餉十一
萬兩一項現照五年遞裁之案本年新舊兩案併計祇

節存銀九萬餘兩不敷一萬數千兩丁漕錢價平餘五
萬兩一項現計因灾蠲緩及以銀完納致令錢價平餘
短少亦止銀二萬五千兩不敷銀二萬五千兩漕項四
萬六千兩一項業經提解輕賚等項及撥還四國洋款
並無餘存川鹽加價五萬兩一項此項加價全數撥還
四國洋款尙屬不敷現實無款可撥宜昌關十萬兩一
項核計該關徵稅最旺之年約銀四十萬兩除解四國
洋款內務府經費槍礮廠經費沙市關借撥經費出使
經費並支本關經費傾鎔折耗存票抵稅等項共銀四
十一萬數千兩已屬徵不敷解上年復加撥稅務司經

費二萬兩尙難騰挪近復派還鎊價銀五萬兩更屬無
款籌解此項撥補鹽釐十萬兩實無可撥又指撥湖北
暫停采買米價運費銀七萬兩原係有著之款現奉諭
旨仍飭采運是此項銀兩今復不能撥補以上皆本省
無著之款卽以所存昭信票銀尾數一萬五千兩補之
無著者仍約三十萬兩至外省之款惟湖南解漕項四
萬兩又平餘銀三萬兩據稱現尙無款須俟明年秋後
籌解其餘指撥湖南四川山西雲南各款疊經電咨催
詢接准咨復均不能解計外省無著之款三十三萬兩
本省外省共無著銀約六十三萬兩此本年撥補百萬

有著無著之實數也一湖北宜昌所收抵債鹽釐止有此數他省之款不能代認也竊惟欲免抵債膠繞之虛懸尤必先清湖北鹽釐所收之實數查宜昌鹽釐向來每年收錢合銀約一百餘萬兩惟內有應行扣除三款一爲鹽釐加課須分一半解歸兩淮旺年一半約收銀十三萬兩乃係兩江之款湖北不能扣留解交稅司一爲籌餉加價旺年宜昌約收十萬兩由四川代收一萬四五千兩川省每未解足合計鄂川實收不過十萬數千兩以供戶部指撥四國洋款十二萬兩計不敷銀一萬數千兩是舊案四國洋款尙難解足斷不能移還新

債一爲江防加價旺年約收十萬兩係奏定專供槍礮
廠常年經費之用疊經欽奉諭旨擴充製造現值各省
練兵京營調械正苦事急款絀尙須添籌更不能解與
稅司還債此係江防由鹽商額外抽捐不在鹽課之內
且江省所抽加價仍係留充江省之用戶部亦未提出
抵債湖北自應事同一律核計除以上三款之外湖北
自收鹽釐所可解稅司者旺年約可共收七十萬兩乃
自上年川匪余蠻滋事沿江商販梗阻所收鹽釐頓減
一成有零計上年閏三月十一日起至本年三月二十
一日止西歷一年屆滿共祇解稅司規元銀六十九萬

三千零合庫平銀六十三萬七千餘兩自本年三月下旬起至年底止收數仍屬不旺與上年相等來春三月約略可知兩年以來川鹽滯銷至此已極日後有無起色尙難預必此戊戌己亥兩年湖北鹽釐所收可解稅司之實數也一本年無著愈多已遵照部電將上年多收之款留抵尙多不敷也查以上年抵還洋款百萬計之上年尙短交稅司銀三十六萬餘兩以上年各省撥補湖北鹽釐百萬計之鄂省實多收銀三十六萬餘兩惟鄂省上年雖有多收之銀而本年撥補之款無著者多至六十餘萬兩且卽有著款內如湖南丁漕平餘明

秋方解本省丁漕平餘裁兵節餉須俟明年夏間奏銷
時方能有款三項約共十五萬兩目前並無實銀而京
餉荊州滿餉東北邊防甘餉及舊案洋款待解甚急萬
難延誤當經電請部示辦理旋准戶部十月冬電覆稱
本年撥補各款解不足數准將上年多收銀數留抵等
語當卽遵辦故不獨將上年多收銀數早已歸入本年
用罄卽本年撥補之款亦經湊解仍屬不敷況復撥款
日增如自上年起每年加撥江漢宜昌兩關稅務司經
費共十萬兩自本年起每年加撥東北邊防經費五萬
二千兩自明年起每年加撥銅價不敷銀二十四萬五

千兩又舊案指還四國洋款之加價短收鄂川共不敷
一萬數千兩統計增款數十萬金尤屬無從籌措此本
年無著太多遵照部電將上年多收留抵之情形也一
以前兩年不敷洋債百萬之數事與湖北無涉湖北實
不能認補也查前准戶部電據總稅務司聲稱宜昌鹽
釐每月約短交銀四萬兩行令設法籌解查宜昌鹽釐
已解稅司銀六十三萬七千餘兩乃總稅司聲稱每月
短解四萬數太不特殊爲難解且無論短解多寡均與
湖北無涉查宜昌所徵鹽釐業已全數交與稅司可謂
悉索無餘矣且原約原案皆指鹽釐今總稅司乃欲於

鹽釐之外更令補解鉅款似非情理所有且派還洋款之數似應按各省原有之款按成分攤方昭平允今以淮鹽皖鄂兩岸計之每年收數約二百餘萬兩止派還八十萬兩湖北宜昌川鹽每年所收不及百萬而派還洋款百萬之多是鄂省本無之款無從解足業經臣等詳細電復戶部聲明總稅司所索每月添籌四萬兩萬難遑辦誠以鄂省羅掘俱窮更無由於鹽務外別謀籌補之方惟查戶部訂立合同係以宜昌鹽釐並萬戶沱加價作抵洋款一百萬在當日戶部之意或以加課全數及萬戶沱加價均爲鄂省所收故以百萬全數責之

鄂省今查萬戶沱加價每斤三文乃光緒十一年兩江
督臣委員設局所收奏明咨行各省有案並加課一半
解淮銀兩均與湖北無涉亦經臣等電達戶部至此款
應否令兩省認還應請部臣籌度湖北未敢越俎置議
嗣准戶部勘電稱已電令兩江解交稅司惟江省所收
萬戶沱加價及一半加課兩款上年亦屬短絀約共收
銀二十五萬兩上下合鄂省所解稅司之數亦止有八
十八萬兩以之統抵洋款百萬尙不敷銀十二萬兩此
項不敷之數應請由戶部酌核辦理總之鄂省久已枯
竭實屬無法再認戶部通籌全局至公至平想不至再

以此責之鄂省此戊戌己亥兩年不數洋款並非鄂欠應請敷部另籌之情形也一湖北鹽釐抵債願認定一確數戶部撥補亦祇請實撥此數以免虛懸推延也查以後宜昌鹽釐或鄂款或江款必須各定一抵還確數方免推諉膠纏以致部臣核計爲難無從豫籌擬自明年四月起無論收數盈絀鄂省自願認定湊足七十萬兩解交稅司如收數不足則由鄂省奏明另行動支他款籌補斷不能掣動舊案四國洋款之籌餉加價槍礮廠經費之江防加價如收數有餘則報部候撥其不敷三十萬兩鄂省論力則久已枯竭論理則非所當認惟

有鑽懶天恩免令鄂省認還其由部撥補之款鄂省亦
祇願收銀七十萬兩明年請由戶部指撥湖北湖南兩
省有著之款毋庸另撥他省徒多虛懸致誤要餉如湘
鄂有著之款不敷撥卽由鄂省在於江漢宜昌兩關稅
內撥足以免貽誤而資周轉查鹽務日疲以後收數能
否復舊實所難料歲認七十萬之數並無把握然值時
勢艱難部臣派撥固亦甚費籌維臣等仰體宵旰憂勞
不敢不勉任其難認一定數以備部臣豫籌此以後湖
北宜昌鹽釐認抵洋價實數之辦法也以上所陳俱係
實在情形合無仰懶天恩俯念鄂省物力困竭敷部詳

核通籌庶幾應還洋款及本省應解要餉各不虛懸兩無貽誤鄂省幸甚

硃批戶部妥議具奏欽此

整頓田房契稅摺

光緒二十五年十二月二十九日

竊照湖北自鹽釐抵還洋債以後戶部撥補之款不敷至銀數十萬兩又益以加撥東北邊防五萬二千兩加撥銅價二十四萬五千兩添撥兩關稅務司十萬兩舊案四國洋款加價不敷一萬數千兩數月以來臣等督飭司道迭次籌議即使明年戶部撥補皆係有著短絀實款亦在四十萬兩以外况有著者目前未必據有實

銀斷非騰挪推緩所能支持且庫中各款俱竭卽騰挪亦無從措手近又屢奉諭旨練兵固圉籌辦江防尤應欽遵於武備實力經營以備不虞軍實所需亦必從酌增新餉是非實有開源之法不可惟今日物力困敝籌餉尤難體察鄂省情形諮訪眾論擬有籌辦之法三條一整頓田房契稅一抽收煙酒糖稅一加徵土藥稅釐三事並舉或可得有大宗的款以資補苴查湖北田房稅項每年所解正稅盈餘不足萬兩以通省六十八州縣計之何止此數而稅收如此之微者一由於民間多以白契成交不肯投稅一由於民間雖經投稅多乘地

方官交卸之時減收契稅僅蓋縣印並未照例請粘司印契尾一由於書吏包繳乾沒亦多官吏相沿視爲陋規輒視此項印稅爲固有之利層層中飽以民間隱匿串減而稅去其一書吏攬契包繳而稅又去其一州縣不盡報解而稅又去其一致稅收甚屬寥寥三弊迭乘而契稅盡矣今欲一清積弊莫若由司頒發契紙查湖北各府縣向多由官刊發契紙者茲擬變通辦法毋庸再粘契尾改由藩司善後局刊刷三聯契紙蓋用藩司印信編立號數令善後局會同經理以杜司吏需索之弊先行發交各州縣若干張存儲備用將用盡時卽先

赴省續領庶隨時皆有司契可便民用由各州縣選派
公正紳士設局經理不假吏胥之手以免擾民局紳不
管他項公事不責令攻訐舉發致斂眾怨祇專助官清
理契據取其與民交接其情易通嗣後民間賣買田房
一經成交業戶卽自行赴局投稅請領司印三聯契紙
照式填寫於契內騎縫價值數目上加蓋縣印將中一
聯截發業戶收執上一聯賚司稽核下一聯留縣存查
各處皆可參觀覆對稅收視契價而定不致有報多報
少之事如此則以後民間無不用司契之產州縣自無
私稅匿報之弊而稅款可期核實矣惟是稅契一事有

積習相沿須量爲從寬之處亦有鄉民不便須設法體恤之處總期於籌餉之中仍寓恤民之意茲定有簡明章程十條第一條遵旨酌定年限查辦契稅光緒元年以前白契未稅者令領新契免其照例罰半充公並免其補稅元年以後未稅者亦免其罰充但令照章補稅第二條舊契但有縣印而未粘司尾者令換新契並不再稅其地價在錢五十串以上者繳契紙費銀二錢價在百串以上者繳契費三錢二分地價再多亦不加費其價在五十串以下者領契免費查稅契定例應粘司尾此等無尾之契乃州縣交卸減價田主已占便宜今

令換司契法所當然契尾之費鄂省向係制錢一串內外新章極力減少此費係爲契紙工本及局用之需大約僅止敷用如有盈餘解省充餉第三條舊契已粘司尾者免其換領新契以省煩擾第四條祖產相傳田地房屋管業已久或契據遺失或兄弟分產或山改爲田或屋拆爲地此類甚多但有糧串及他項簿據里鄰周知者並不追究其願補領新契與否聽其自便如願補領須有鄉鄰具保只繳契費不令納稅第五條自己之地造屋者無論城市鄉鎮其地如已有契房屋斷不另行查契第六條不派書差勒傳亦不派紳士挨戶清查

但出示曉諭並令地保沿街鳴鑼傳知不准入業戶之門自無騷擾第七條舊契無司尾者但將新發司契粘貼舊契之前其舊契仍在將來業戶買賣自可查對不至有謄寫錯誤訛詐滋訟諸弊第八條凡舊日未粘司尾之契領換新契者限於六個月內一律領換以後田產詞訟如新契未用司契者或舊契未粘司尾者官司斷案不以爲據至六個月之限爲期甚寬或於完錢糧之便入城換契或自來城或託親友均聽其便或有貧富孤寡無人距縣過遠以致換契逾限者該處紳耆查明屬實稟縣從寬第九條四鄉向有徵糧分櫃者准其

託鄉櫃代換意在便民免其入城跋涉其向無鄉櫃者
如鄉民嫌入城較遠紳耆公議願在四鄉設分局者州
縣體察民情酌辦由鄉局將原契送城查驗印發新契
自願入城領契者聽城局限次日發還鄉局限十日內
發還第十條應完正稅應繳契費之外如有官紳吏胥
藉端需索者告發嚴參罰辦以上十條皆係參酌民情
事事從寬期於通行無礙者也至徵收稅契銀兩歷有
舊章仍飭各州縣照章徵收不得因設局清查藉此加
徵分釐查此項契稅久歸中飽現經設法整頓地方官
已將從前所得陋規和盤託出惟各州縣公務繁重卽

此項契稅查辦收解及設局一切之用在在需費必須酌予寬恤令其足敷辦公始足以養其廉不致別滋流弊且州縣向來所沾潤究係取之盈餘與侵蝕正賦者尙屬有間擬將所收稅銀除額徵正稅仍飭各州縣照案批解司庫外所徵盈餘銀兩准於三分之中酌提一分留爲州縣辦公之需似此寬其既往嚴其將來並爲之留餘地使不致辦公竭蹶儻復敢隱匿侵蝕嚴加懲儆斷不寬貸庶幾往年積弊爲之一清歲收盈餘當可增多數倍此整頓契稅辦法也其酌抽煙酒糖稅及加徵土藥稅兩事章程各有不同所有詳細辦法於此次

另片奏陳以清眉目正據司道查詢各屬詳議章程會
詳請奏聞適准戶部咨以洋債軍餉兩項需款不敷甚
鉅奏准籌款六條以資周轉其中卽有整頓田房契稅
及加徵煙酒土藥釐稅三條臣等伏查湖北情形實與
他省不同撥補無著已鉅加撥之款尤多要餉固難貽
誤練兵亦不可緩不得已督同司道悉心籌維計惟有
整頓契稅及酌抽煙酒糖稅加徵土藥稅三款或可爲
鄂省外應洋款內顧軍餉各項之用現在甫籌開辦究
竟各項收數能否集成鉅款尙難預必第旣有此項來
源要可藉資周轉惟念湖北半年以來苦思經營原爲

湊補不敷之用隨准部咨籌款六條亦以此三項爲言
湖北籌之於先部咨繼之於後如部臣以爲係由部飭
籌之項飭仍提解部庫則鄂省撥補不敷各款又將束
手無策勢不得不仍請由部改撥恐部臣仰屋爲難亦
必無實款可撥往返推延徒致貽誤自惟有請將此三
款俱留湖北本省湊供不敷各款且所供者最要之款
卽係京餉荊州滿餉武衛中軍餉東北邊防餉甘餉及
洋款各項實與提解部庫無異亦與部文籌備洋款軍
餉之原意相符况部文加徵者乃煙酒釐金現已照新
章加徵此次所抽者乃煙酒糖落地產地稅與部文所

加釐金不同至宜昌關稅止有土藥一項其百貨皆係
轉口屢次部撥各餉皆係取給於藥稅一款自不在提
解之列合併聲明合無仰懇天恩俯念湖北各款短絀
過鉅地處長江上游江防重要練兵尤亟更當欽遵趕
辦准將新籌契稅並另片所陳抽收煙酒糖稅及加徵
土藥稅一併留供本省各項不敷及練兵新餉之用地
方幸甚

硃批戶部覈議具奏片二件併發欽此

加徵煙酒糖稅片

光緒二十五年十二月二十九日

再湖北現因各款短絀整頓田房契稅及抽收煙酒糖

稅以資補苴除籌辦契稅另摺奏陳外查煙酒糖三項
湖北本省各屬多有出產製造之區其外省販運來鄂
落地行銷者亦廣因思煙酒糖不過供人嗜好之物並
非貧民日用所必需較之糧米百貨迥不相同自可酌
量加抽稅項查光緒二十年曾准部咨行令煙酒加收
三成茶糖加抽二成當經遵照加抽奏報在案惟前次
及此次部章加抽係指各釐局所收過境之釐並未於
出產之處就地徵稅亦未於行銷落地之處抽捐茲擬
除過境釐金照章加抽現於販運過境者概不過問外
飭令各州縣并委員於出產地方商販繁盛行銷市鎮

設立專局專就煙酒糖三項分別出產落地酌抽稅項
此與部章加徵過境釐金辦法兩不相涉就市價之低
昂定抽稅之多寡總以不及其價十分之一爲度所有
本省出產煙酒糖一經報完稅項粘貼印花准其運往
各處行銷但於起坡處所赴局報驗不令重完其外省
煙酒糖運來本省行銷應完落地稅者令其赴坡報由
局中查驗照章完稅方准銷售此項抽收稅款雖取之
於商販之人而仍係食戶之所攤派散之全省於民間
本無大累况煙酒糖三項皆非日用所必需即使此次
抽稅價值稍昂亦於窮民生計斷不至於有礙惟創辦

伊始現在所定抽稅章程將來應否增減應俟試辦數月以後酌度情形再行妥定畫一章程奏各定案至此項產地稅落地稅係在部章加抽釐金之外湖北撥款日增需餉尤急種種支絀情形業經臣於整頓契稅摺內詳細瀝陳相應仰懇天恩准將此項煙酒糖稅留供本省不敷各項要需以資接濟

加徵土藥稅片

光緒二十五年十二月二十九日

再查宜昌關稅專恃土藥一宗與他關以貨稅爲主土藥只屬一端者迥然不同近年以來該關每歲僅收稅銀四十萬兩內外乃指撥之款屢次加增以入抵出不

敷甚鉅而鄂省本年撥補鹽釐無著之款甚多近又加派銳價不敷銀二十四萬五千兩東北邊防五萬三千兩收少撥多更無挹注之方該關非加徵土稅斷斷無從湊解正在議詳具奏聞准戶部咨奏准籌款六條內有加徵土藥稅釐三成一條復經轉飭核議詳辦查湖北土藥來自川滇其行銷有水陸兩路陸路上藥商販經行之處毗連湖南陝西省山路紛歧如驟議有加徵必致多方繞越查不勝查稅收反更有減無增且各省情形不同亦恐不能盡一應俟詳加籌議另行酌辦至水路行銷土藥均由川省乘用長江輪船運銷經過

宜昌洋關報完稅釐沿江直下若上下游一律照加自然無可繞避擬卽遵照部章將土藥稅加徵三成查宜昌關上游有四川重慶關川省爲產土之地土商定必繳懶輕稅其如何辦法應聽川省自行斟酌如川省一時尙未議定宜昌關卽先行遵章加徵尙可無礙未便停待惟下游上海天津寧波汕頭四關最關緊要必須同時舉辦如下游別省不加僅止鄂省宜昌關獨加稅銀土販繞道趨避必至全無收數相應請旨飭下總理衙門戶部催令下游各關照加並令總稅務司分飭滬津寧汕各稅司遵辦一律加徵以裨餉需至宜昌關稅

專指土藥一項與他關情形不同且指撥各款太多不
敷撥解此項加徵稅銀自應仍留該關湊解部撥各項
并撥補鹽釐不敷之用邀免另提解部俾免貽誤

張文襄公全集卷五十終

新城王樹樸校

張文襄公全集卷五十一

奏議五十一

拏獲悖逆惑眾匪犯審明懲辦摺

光緒二十六年三月二十八日

竊照上年十月據長江水師漢陽鎮總兵周芳明呈轉據田鎮營前哨守備王文明稟稱漳源口地方有土客船隻經過船上數人登岸游行至已經封禁之土娼家內有少年楊姓大言恫喝勒令揭封當經彈壓不服旋持楊國麟名片傳該守備上船謁見痛加呵詈自稱係江西按察司攜有官銜燈籠忽又稱係宗人府官語言狂妄形跡可疑當將一行人等解交蘄州經該州凌兆

熊提訊其楊姓一人情形狂傲言語支離先供稱名楊國麟卽楊海樓係廣東大埔縣人郎中楊姓之子由四川遊峨眉山重慶涪州一帶回來將往江西龍虎山張天師處正擬將其遞解忽自稱係康有爲之弟又稱係五王爺語言多無倫次臣等接據該州稟報後當卽提省查訊該犯到讞局後供詞益復變幻初供係康有爲之第三胞弟康有章年二十八歲訪之各處粵人僉云未聞康有爲有此胞弟因詰以康有爲之祖父子女住址及鄉試科分厯年蹤跡一概茫然不知則又供係康有爲之族弟查訊同行土販等據稱該犯自四川重慶

涪州至湖北利川宜昌漢口其僕從及眾人皆呼爲楊少爺帶有楊國麟名片又聞人呼爲楊海樓所携摺扇上寫有海樓字樣一路忽稱甲午科翰林忽稱吏部尙書楊暉廷之子忽稱和碩親王忽稱五王爺忽稱宗人府查事人員並稱有九頭獅子印六花玉牌等物被竊失去其僕從皆係在川楚沿路雇覓該犯自涪州始搭坐該土販船隻嗣後該犯在讞局忽自稱宛平縣人又稱係宗人府正藍旗人真姓真名斷斷不能說出等語父母名氏住居地方隨口改變每逢問供踞坐傲慢並據供帶有黃馬褂貂褂珍珠朝珠多件當在漢口漢陽

當鋪查提均無其事其在江夏縣外監內向同押各犯
言語狂悖益甚自稱爲天下一人又自稱爲寡人又自
稱爲本朕並云此間督撫兩司皆所素識同時有在禁
之犯張鴻澤朱華山等被其煽惑代爲書寫信件傳至
外間借銀使用令人救伊出監語多荒誕悖謬當有漢
口行醫之楊端臣潛至外監窺探信爲大貴人一見卽
行跪拜楊國麟因口授言語令楊端臣書寫封固交管
獄官署江夏縣典史趙慶頤交付臣等閱看函內大意
自稱僞旨索取庫銀二百兩令送伊往江西龍虎山等
語實爲狂悖可駭但詩意鄙俚有類戲劇因署江夏縣

知縣陳樹屏將該犯刑責故函內痛詆該縣當飭該典
史將楊端臣拏獲發交諫局歸案嚴訊其時正值海外
逆報紛騰之際武漢地方訛言繁興廣播匿名揭帖自
稱兵馬大元帥糾眾爲亂語多影射此案以致眾情惶
惑顯係會匪互相勾串造謠生事臣等因案情重大督
同藩臬兩司親提會鞫該犯楊國麟供詞一味狂誕閃
爍訊其籍貫忽南忽北語音亦南北夾雜絕非京城口
音詰以宗人府衙門在何處宗人府所修玉牒係何事
以及清文滿語一概不知大約係外省人曾到過京城
而爲時不久者最後供係山西平遙縣人歷舉山西太

原直隸獲鹿天津奉天一路城關鎮市甚爲熟悉據供
眞名係李成能山西天津山海關奉天吉林鋪店甚多
因游蕩破家出游客各省該犯有在上海素識之廣東連
州人洪春圃卽洪金能係髮逆洪秀全之後武漢揭帖
內所稱兵馬大元帥卽是此人手下人馬甚多其人能
觀星象占文王課上年八月間曾在漢口與洪春圃見
面該犯一切舉動悖逆言詞皆洪春圃教唆等語臣等
查該犯楊國麟卽李成能自稱僞旨種種狂悖句串會
匪造言惑眾實屬罪不容誅且該犯自川至楚沿路所
帶銀兩金葉甚多用度甚爲揮霍如此舉動其爲會匪

無疑因該犯行徑狂悖過甚以致傳播外間匪徒藉端
造謠展轉附會鄂省人心浮動以該犯如此悖逆狡詐
若不速爲懲辦不足以安靖人心當經飭將該犯楊國
麟卽李成能正法梟示以息訛言而靖地方其楊端臣
一名訊據供稱係江南上元縣人曾在甘肅軍營充當
書識現在漢口行醫與楊國麟素不相識因外間訛言
赴監探視信爲貴人經楊國麟口授令伊代繕悖逆函
件朱華山一名係潛江縣從前拏辦會匪案內留禁省
監待質之犯又已革同知銜候選知縣張鴻澤係四川
人向在沙市充當商董於前兩年沙市焚毀華洋房屋

案內奏明革職驅逐回籍因復潛回沙市生事經臣之洞訪拏發府審辦之犯乃竟不知畏罪守法甘受楊國麟之愚傳遞信件雖該三犯所寫各件俱係言詞鄙俚文義不通跡近瘋迷形同戲劇然當謠言紛騰之時附和生事均屬大干法紀若擬以軍流必致潛逃復行生事該三犯楊端臣朱華山張鴻澤應均予永遠監禁其餘同行人等皆係無知鄉愚小販尙未隨同生事分別責懲開釋至撤任前署江夏縣典史本任崇陽縣桂口巡檢趙慶頤以管獄之官於楊端臣赴外監窺探未加禁察並將其封固悖逆函件不行拆看輒爲代投雖據

將楊端臣拏獲審辦究屬咎無可辭相應請旨將趙慶頤卽行革職驅逐回籍以示懲儆在逃會匪洪春圃卽洪金能咨行廣東及沿江各省一體嚴緝懲辦硃批知道了趙慶頤著卽行革職餘依議該部知道欽此

辦結宜施教案摺光緒二十六年五月二十八日

竊照湖北宜昌施南兩府屬會匪前年因川匪余蠻子之亂羣相煽動擾及利川長樂長陽巴東等縣地方燒燬教堂殺斃教士董若望等及各教民一案匪勢日熾蔓延甚廣幾至不可收拾當經飭派官軍攻破賊巢撲

滅股匪拏獲匪首懲辦地方悉就平定業將各情形詳
細奏明在案所有善後事宜迭飭地方文武妥爲辦理
並據法領事德託美開列各條款要求甚多並索賠卹
銀四十二萬五千兩之多萬難照准當派委候補道朱
滋澤候選直隸州梁敦彥會同法領事德託美等迭次
妥議各條擬給教士董若望家屬卹銀一萬兩其各縣
地方天主堂育嬰堂學房教堂公產並失去什物等項
共給銀四萬四千五百兩完結並議拏辦在逃各犯及
嚴飭地方官保護以後百姓不得與教堂爲難教堂教
士亦不收留匪類干預詞訟以期相安至被匪擾害之

教民由地方官酌量撫卹並於利川縣城內由官出款
建造天主堂一所交天主堂管業等情臣等查所議賠
卹二項共銀五萬四千五百兩較前索之數已屬大減
自可照准其餘各條亦屬可行當將議定條款照繕二
紙札發江漢關道與法領事簽押蓋印各執一紙當由
江漢關撥銀二萬兩宜昌關撥銀三萬四千五百兩共
五萬四千五百兩均交法領事轉給旋因教士以賠款
太少處處刁難欲藉酌量撫卹被害教民一語以各縣
家數太多添索數萬鉅款案懸不結復飭江漢關道暨
委員與法領事商議統給各處被害教民卹款共一萬

兩交教士分散不得再生枝節經法領事稟明法公使
照允照會江漢關道在案此項續議卹款一萬兩仍由
江漢宜昌兩關支給法領事查收轉給完案伏查此次
滋事匪徒係屬會匪乘四川余蠻子滋事之時藉端倡
亂糾眾響應立有僞主帥軍師先鋒等名號蔓延數縣
勢甚猖獗重煩兵力始克勦平地方官猝不及防力亦
有所不及與尋常鬧教毀堂者情形迥殊其賠卹之款
未便攤派且署長樂縣知縣劉綬青蘇貽英等業經奏
參革職更屬無從追繳合無仰懇天恩俯准查照光緒
十七年武穴宜昌十九年麻城各教案賠款卹款均由

江漢宜昌兩關支給成案准仍由江漢宜昌兩關動支
出自逾格鴻慈謹合詞恭摺具奏伏祈聖鑒
硃批著照所請該衙門知道欽此

派員代理湖北提督摺

光緒二十六年五月二十八日

竊照現值北方有事近畿紛擾湖北人心浮動匪徒藉
端造謠襄陽以北與河南等省接壤伏莽素多尤慮蠢
動襄陽實爲楚北邊要重鎮係提督所駐之地本任提
督臣張春發現統武衛先鋒左軍駐防江北臣奉旨兼
署提篆自應兼權統籌以副恩命惟是臣以總督駐陝
鄂省現當多事之秋籌兵籌餉事事不遑襄陽懸隔千

里一旦有事所有臨機籌防一切殊難遙度必須有提督坐鎮其間督率提標各營將弁兵丁平日認真操練防患未然遇有土匪竊發臨時應機勦捕庶可早遏亂萌免致貽誤惟臣係奉命兼署惟有奏明派委大員代理期於邊境有裨查有現署鄖陽鎮總兵之提督鄧正峯老練深穩紀律嚴明久歷戎行嫾於兵事堪以代理湖北提督篆務其鄖陽鎮總兵臣當另行委員署理如鄧正峯訓練切實措置有方再行奏請署理再時艱事亟可否仰懇天恩卽令鄧正峯署理湖北提督之處伏候聖裁

硃批著照所請該部知道欽此

會派藩司統軍北上摺

光緒二十六年六月二十
五日

竊臣等承准軍機大臣字寄光緒二十六年五月二十
一日奉上諭著各直省督撫迅速挑選馬步隊伍各就
地方兵力餉力酌派得力將弁統帶數營星夜馳赴京
師聽候調用等因欽此跪聆之下焦灼萬分亟欲立起
全師星馳就道惟湖南地方伏莽素多鄰近黔粵各省
亦有匪徒頻思蠢動湖北沿江一帶民氣浮囂目下江
防倍形喫緊皆須兵威鎮攝保守疆土卽以護固餉源
不得不加詳慎當經往復電商數少不能自成一軍多

則餉力不及查湖南新軍勁字五營步隊二千五百名
訓練已嫻堪備戰守適原派統帶之永州鎮總兵熊鐵
生自渝關撤防時卽患風疾近年調治漸痊而足疾仍
未大愈行步維艱於臣等未議派兵北上之先卽以傷
病舉發票請開缺由臣之洞另摺具奏請准其開缺並
將永州鎮缺請旨簡放經臣廉三改委藩司錫良統帶
勁字五營該司前經奏明派辦營務處事宜隨時赴營
課操將士均皆服習較之更易生手似覺穩妥添派湖
南候補道張成基爲分統兼湘軍營務處仍以調署長
沙協副將崧煜爲幫統湖北亦將武功武愷武防等營

湘省勇丁挑選添募共爲五營計步隊二千五百名委
前南韶連鎮總兵方友升爲統帶兩省合軍庶足獨當
一面錫良於六月初八日交卸湖南藩司篆務旋配足
軍械領軍啟程抵鄂後卽由臣之洞臣蔭霖將武功營
弁勇均交錫良總統惟湖北境內止有小車軍火器械
甚爲繁重轉運不易當經趕備車輛人夫已於本月二
十一日各營陸續開拔前進取道河南信陽州等處北
上以達直隸並電知河南撫臣裕長迅飭南汝光道設
立轉運局以免阻滯所有湖北武功營湖南勁字營弁
勇糧餉均照湘軍行營章程發給各歸各省開支錫良

本任半廉由湖南藩庫照例支給其行營半廉公費及隨營辦事文武員弁薪水並所帶親兵小隊一百名口糧均由湘鄂兩省各半分認撙節支發實用實銷至該藩司錫良統兵北上道遠事繁刊給木質關防文曰總統湖北武功全軍湖南勁字全軍湖南布政使行營之關防領收開用合無仰懇天恩俯准專摺奏事俾免遲誤

硃批知道了欽此

擒誅自立會匪頭目分別查拏解散摺

光緒二十六年八月

日三十

竊查自北方開戰以來各省匪徒咸思蠢動臣等欽遵
諭旨保守疆土欲防外侮必須先清內匪當卽增募營
勇分路籌防七月初間湖北巴東長樂等縣果有會匪
糾眾豎旗起事正在派兵勦辦旋聞安徽大通已有大
股會匪突起焚劫其勢甚熾湖北沔陽州之新墻蒲圻
縣之羊樓峒湖南臨湘縣之灘頭均有會匪接踵而起
民間大爲驚擾荊州之沙市以及嘉魚麻城等縣均有
會匪謀亂情事各匪聚眾點名打造刀械製造號衣儲
備米糧一似錢財甚爲充裕者並聞有私運外洋軍火
之說當經遴派員弁營勇分路密查勦捕以武穴向爲

下游門戶會匪之數并派營勇兵輪前赴該處查拏防
遏同時各省拏獲各匪皆係領有富商票此票乃仿照
哥老會散放票布之辦法其票係上海洋紙石印寫刻
篆印皆極精工上橫書富有二字直書憑票發足典錢
一串文前有編號後有年月背有暗口號圖章二顆用
在湖北者又鈐楚字圖章其命名蓋暗寓富有四海之
意實屬悖妄已極凡領票者均係句串一氣互爲聲援
據匪首散票者告人云持有此票即可向該匪首處領
錢一千文以後乘坐怡和太古輪船不索船價并云中
國卽將大亂以後持票即可保家以故各省會匪趨之

若驚旋經查出此乃大逆康有爲一人主使調度其夥
黨分布各省展轉煽惑其巢穴卽在上海於租界內設
有國會總會入會者亦不盡康黨沿江沿海各省皆有
國會分會而分會中以漢口之分會爲最大因武漢當
南北適中之地居長江之上游而兩湖會匪又最多故
先於武漢舉事其會名曰自立會其軍名曰自立軍向
煽三江兩湖等處哥老會匪糾眾謀逆定期於七月二
十九日武昌漢口漢陽三處同時起事約定新隄蒲圻
之匪速起大股前來接應岳州沙市之匪遙爲聲援先
於二十七日訪有端倪密飭員弁在漢口地方李慎德

堂及寶順里內拏獲兩湖分會總匪首唐才常匪首林圭李虎生等三十餘名唐才常係督辦南部各省總會又督辦南部各省軍務處林圭係統帶國會中軍李虎生係總窩戶當時在唐才常寓所起獲軍械火藥僞印僞札僞示及富有票多張又入會各匪姓名簿又購買洋槍刀械用款雇募奸細分往各城各營各局充當內應月支薪水用款招募會匪自稱發餉用款各項帳簿又各省匪黨往來逆信又洋文自立會辦事規條皆在唐才常屋內搜獲並同時在漢口漢陽拏獲同夥謀逆之哥老會匪首瞿河清向聯陞等發交營務處司道武

昌府江夏縣公同審訊該匪等供認開設自立會句結
哥老會散放富有票同夥謀逆不諱當卽將該匪首唐
才常等二十名正法示儆旋在嘉魚縣拏獲匪黨蔣國
才搜獲富有票黃旗及各匪口號名單及正副會長康
梁僞諭暨供出各匪姓名續據湖南拏獲會匪頭目李
英譚翥等供稱康有爲在上海開富有山正龍頭係康
有爲唐才常梁啟超李金彪楊鴻鈞師馬炳等唐才常
派爲上海總糧臺聽說康有爲諸黨派人會合大刀會
該黨已到山東此事是康有爲爲總康有爲以唐才常
爲總唐才常以辜仁傑卽辜洪恩師馬炳卽師襄爲總

湘省聞拏自盡之汪鎔派爲長沙總糧臺各糧臺之錢
均是康有爲接濟等語查蔣國才匪單內係康有爲爲
正龍頭梁啟超爲副龍頭並據唐才常供上海國會總
會頭目係廣東人容閎此外各處所獲哥老會匪供詞
供出康有爲唐才常爲首者不計其數查獲逆信偽札
及各匪供尙有沈克誠陳謨林杰卽林邦威容闔李松
芝蔡鍾浩汪楚珍張堯卿戴保廷均爲謀據兩湖之大
頭目秦俊傑卽秦立三又名秦郵卽大通滋事首匪復
經密札密咨鄂省各省查拏並照會各國領事在案並
准大學士直隸總督臣李鴻章電咨湖南巡撫臣俞廉

三咨查出訊出康有爲唐才常容閔等句匪作亂私運
外洋軍火情形大略相同暨准兩江總督臣劉坤一安
徽巡撫臣王之春咨富有票匪擾亂長江派兵勦捕起
獲匪票偽示私運軍火各情形與鄂省所查皆相符合
查此項自立會匪唐才常等以康逆死黨窟穴上海設
立總會自爲總糧臺往來沿江沿海各處廣散銀錢購
誘會匪計謀凶狡黨夥紛繁其匪黨往來書信大指因
北方有警乘此煽動沿江沿海各省各種會匪同時作
亂其同謀勾結之人各省皆有其購械募匪之款查簿
內存款計洋銀一萬五千餘元用去已將及萬元聞康

有爲詐騙斂集之款共有銀六十萬元安排以二十萬元用之長江所散放之富有票就兩湖地方查出供出者已有兩萬餘張事發後兩三日尙有人向李慎德堂投遞匪黨逆信經稅務司郵政局拏獲數起其僞札有曰指定東南各行省爲新造自立之國其華洋文規條內有曰不認滿洲爲國家其僞印文曰中國國會分會駐漢之印又曰中國國會督辦南部各總會之關防又曰中國國會督辦南部各路軍務處之關防又曰統帶中國國會自立軍中左右前後等營各關防其逆信內有曰以湖北爲中軍以安徽爲前軍以湖南爲後軍其

唐才常身邊小篋內搜出僞號令告示稿有曰焚燬各衙署佔奪槍礮廠劫掠局庫佔踞城池焚戮三日封刀安民派將固守再籌征進其逆信內有曰沿途亦可劫掠其開用僞關防札稿內有曰業經報明滬會篆刻關防一顆內刊中國國會督辦南部各省總會字樣於庚子年七月初八日開用等語唐才常等到案一一供認不諱至其平空造言捏誣狂吠詆毀兩宮悖逆凶悍筆不忍書令人髮指該會匪等以自立爲名號以焚戮劫掠爲條規以富有票爲引誘以哥老會紅敎會及各省各種會匪爲羽翼意欲使天下人心同時搖動天下

民生同時糜爛實爲凶毒已極又查僞札有云本國會深憲危亡等語實屬狡詐膽妄該匪首僞爲國會造此詭辭冀以誑誘躁妄之文士鼓動無知之愚民尤爲可惡竊惟目前時事雖棘上下同心力圖振作尙可勉籌補救之方若該會匪各省蠶起外人乘之則中國真將有危亡之勢矣今該會匪旣已自稱爲新造之國公然自立不認國家是明言不爲我皇上之臣子矣乃尙敢託保國之名以逞其亂國之謀不獨中國忠義臣民不受其欺凡各國明理曉事之人恐亦不受其欺也近日鄂湘江皖各省滋事之匪查其逆信票據供詞皆係

自立會匪之黨皆係領富有票之人其合夥約期濟械
助費分據地方安排接應均經查有實據查李慎德堂
前門在英租界之內當日查拏各匪之時係由英領事
簽字派巡捕協同往拏當場眼同起獲各種謀逆作亂
器械憑據華洋人等眾目共覩因此各國領事皆深知
此輩實係與哥老會合夥必應查拏以免擾害地方除
湖北湖南兩省隨時密查嚴拏外此外沿江沿海各省
皆有分會其往來於上海者尤多應由各省自行查拏
已將先後迭次查出供出緊要各匪首姓名籍貫陸續
開單分咨各省一體嚴密懸賞查拏務獲懲辦以懲亂

逆而安大局至唐才常供出同會同謀之人甚多凡係
查無實據者概不株連其軍民人等誤領富有票者准
其向官司營局團紳首士繳票銷毀卽免追究予以自
新若觀望藏匿不繳者查獲匪票定行重辦自漢口匪
首伏誅後各路匪徒聞之震懾奪氣惟富有票放出太
多其悍黨匪首尙多漏網現已訪知仍復潛踪往來上
海長江一帶別設狡謀力圖糾眾報復沙市岳州常德
澧州一帶匪徒尙在煽惑窺伺新隄之匪竄擾湖南之
臨湘巴陵及監利之朱河等處其監利沙洋麻城嘉魚
崇陽巴東長樂之匪仍飭各營分投搜勦解散其襄陽

棗陽隨州應山等處界連豫邊素多刀匪豫省年來旱荒飢民頗衆亦遂有會匪開堂放飄之事自七月以來藉鬧教爲名嘯聚焚劫自立會匪滋事後查有匪目潛往孝感應山河南信陽州一帶謀劫北上諸軍軍火並煽誘河南饑民來漢滋事現又訊出有匪首潛往襄樊一帶煽動刀匪已添募馬步各營沿邊防遏入境卽擊八月內四川巫山縣有匪千餘人滋事亦經派營會合川軍相機勦捕臣等伏查康逆近年遁逃海外散布邪說久思煽動奸人擾亂中國以逞其報復之志茲因各國構衅中國兵威不振以爲有機可乘遂敢遣其黨羽

分布沿江沿海各省句匪作亂而湖北尤爲該匪注意所在值此時局危急一經煽動立卽四路響應兩月來武漢商民惶擾遷徙一夕數驚幸仰賴朝廷威福先期破獲擒誅渠魁巨黨多名各處聚集援應之匪先後擊散陸續擒斬匪目數十人目前人心粗定惟有仍一面督飭各軍各州縣嚴防密拏解散脅從一面照會各國領事布其逆亂罪狀囑其轉告外部勿爲所惑目前據各領事言從前謂康梁爲志士今已知康梁爲匪徒各國斷不幫助庇護此實由該逆等稔惡窮凶天奪其魄爲悖亂盜賊之事布悖亂盜賊之言奸謀逆跡盡行敗

露從此爲各國所屏棄誅殛之期當不遠矣惟是湖北數月以來自北方有警長江人心惶惑各匪四起陸續增募勇營數十營上游則界川之宜昌下游則界江西之武穴南則界湘之荊州北則界豫之襄陽隨州棗陽應山麻城中路則沔陽新隄沙洋嘉魚蒲圻崇陽監利皆爲會匪出沒之所皆須派營駐守隨時相機勦捕並派營前赴湖南之岳州河南之信陽州越境勦捕巡防以固藩籬各屬請兵請械應接不暇羅掘多方增兵旣多增餉尤鉅種種艱難急迫晝夜不遑惟有竭力鎮撫相機籌辦隨事與湖南撫臣兩江西安徽督撫臣互

相知會合力辦理以維上游大局至此次查訪擒獲自立會匪渠魁暨分路防勦捕獲領放富有票逆匪首要各員弁發奸弭亂俾沿江沿海各省得以周知爲備似尚有裨大局合無仰懇天恩俯准臣等查明奏請優獎以示鼓勵

硃批覽奏殊堪痛恨著卽會商沿江沿海各督撫將此項會匪飭屬一體查拏盡法懲治務絕根株所有此次擒獲首要及發奸弭亂各項出力員弁准其從優請獎以示鼓勵欽此

參將查匪不力請旨革職摺光緒二十六年八月三十日

竊臣訪聞湖南岳州文武衙署水陸兵勇各營多有富
有票匪混迹其間署岳州營參將秦三元營內卽所不
免適准湖南撫臣俞廉三函述情節相符伏查長江一
帶會匪素多近自富有票匪散票句炳各種會匪往往
領票入會混入各營兵勇及長江水師者甚多疊經臣
嚴飭水陸各營將弁嚴查密拏在案岳州爲南北兩省
咽喉票匪最注意於此訊出匪首多係籍隸岳州盤踞
煽誘蓄謀甚深目前匪勢仍復眈眈思逞現查知該參
將所請練兵百名其中卽多係領有富有票者實堪駭
異似此昏謬粗率一旦有警必然貽誤事機當此防務

喫緊之際未便稍事姑容聞巴陵縣知縣周至德所募營勇票匪亦多除該縣已由湖南撫臣俞廉三撤任另行奏參外相應請旨將署湖南岳州營參將本任湖北撫標中軍參將秦三元卽行革職以爲營務含糊查匪不力者戒

硃批著照所請兵部知道欽此

請調武功營赴行在片

光緒二十六年八月三十日

再前奉諭旨飭調武功兩營愷字四營北上當以此六底營原止一千五百人兵力過單因專派前南韶連鎮總兵方友升添募精銳足成五整營與湖南撫臣商酌

兩省各派五營共合成湘勇十營以期力厚心齊以湖南藩司錫良忠勇直爽故奏派錫良總統率之遄行又因快礮爲行軍利器加配快礮十二尊添募礮隊兩哨二百五十人計鄂軍共二千七百五十名以致兵數益增軍火益繁查近日兵事專恃槍礮藥彈臨戰則患其缺乏軍行則苦其笨重故湘鄂兩軍每軍軍火輜重各數十萬斤鄂軍尤多沿途車輛短少各軍只能分起開行嗣聞北事日急疊奉諭旨嚴催臣等札飭電飭方友升懸賞銀五千五百兩如各軍能早渡黃河者卽行分賞並飭該前鎮入豫境後可先挑精銳千餘人輕裝疾

馳照前敵行軍辦法每人身帶槍彈一百二十顆先行
進發其餘大批軍火輜重隨後繼進該軍開行後臣等
疊經札催電催無如河南年歲荒旱車輛極艱入直境
後尤甚又以天氣酷熱各軍冒暑趨行病疫甚多接閱
稟報焦急萬狀嗣聞聖駕西巡尤爲惶悚迫切該軍自
應馳赴行在稍盡拱衛之忱乃疊接錫良函電先經大
學士榮祿札飭駐防正定旋復飭駐固關又兩奉廷寄
飭赴行在旋又經山西撫臣奏准暫禁懷慶近又接錫
良電湘軍不日到晉鄂軍暫駐直境等語竊維直境固
亦需兵惟巡幸外省扈蹕之軍尤關緊要况方今時事

紛紜沿途潰勇游民恐必不少必須軍威較盛且以忠
純篤實之大員統之方能除道清塵彈壓一切相應請
旨敕令錫良將方友升武功營調赴行在他省不得扣
留仍與勁字五營合爲一軍歸錫良部下調度以資扈
衛而供驅策且可與宋慶馬玉崑岑春煊諸軍互相協
助似亦不無裨益

硃批錫良已授山西巡撫湘鄂兩軍仍歸統帶布置後
路防務欽此

派員齋摺恭請聖安並進方物摺光緒二十六年八月十九日
竊以此次衅端猝啓變出非常臣等才智庸鴦兵力單

薄不能爲國家執戈禦侮自聞鑾輿出狩艱險備嘗拱
衛未親奔問未及憂惶愧憤負咎若山循省愆尤百身
奚贖所有疚悚瞻系下忱業於八月十二日電由護陝
西撫臣端方代繕奏摺馳遞在案猶幸六飛所莅安電
頻傳下忱稍爲定慰伏讀疊次行在詔書宏禹湯罪已
之思開漢唐直言之路遐邇傳宣愚頑感泣凡爲臣子
更屬無地自容惟冀天心悔禍眷佑彌隆我 皇太后
皇上至誠動物孚化遠邦早日開議上安宗社下慰兆
民臣等亟應馳詣行在稍伸瞻戀微忱祇以長江防務
加嚴會匪逆氛未靖遵旨保守疆土職任未敢暫離謹

率同提鎮藩臬諸臣具摺恭請聖安專派湖北督糧道
譚啟宇齋呈並呈進方物十三種仰懇俯鑒微憇准予
賞收臣等無任瞻仰屏營之至

借款充餉摺

光緒二十六年九月初六日

竊照湖北一省財力向非充裕近年經戶部指撥加撥
及攤還新舊洋款鎊價等項竭力勉籌久已入不敷出
曾於上年十二月具奏撥補宜昌鹽釐案內詳陳艱窘
情形早在聖明垂鑒之中本年入夏以來中外構釁遵
派援軍北上及籌備江防添購軍火用度浩繁加以富
有票逆黨潛入長江勾結各路會匪乘機起事武漢宜

荊黃沿江各屬伏莽同時蠢動襄陽德安兩府毗連河南之各州縣屢有豫匪闖入與教尋仇其宜昌之巴東長樂等縣施南之建始利川等縣又有川匪頻思竄擾節經添募重兵租雇輪船分投防勦於是各項餉需頓增倍蓰而常年京協各餉暨道旨購運米糧在在均關緊要亟應統顧兼籌滿擬錢糧正賦關稅釐金逐加整頓收數漸增稍資挹注無如交六月後天氣亢旱各屬高田半遭枯損頓致轉豐爲歉逆料本屆漕糧徵收斷難起色而寇氛疊警華洋商賈亦皆觀望不前以致關稅釐金同形短絀臣等焦憂無術仰屋徒勞當此軍務

喫緊之秋萬一餉源不繼饋運有稽貽誤事機爲患何堪設想不得已擬向殷實票號息借數十萬金暫資供億乃各票號咸以商情疲滯財源枯竭展轉詢商百無一應各國駐漢領事及洋行稔知鄂省需款甚急爭來探問願借巨貲臣等念此時戰釁方開各國尙肯以重金見貸略可覘其並無佔據中國之心而藉此以隱事羈縻亦未始不一舉兩得因英國領事法磊期申說最先議息亦最輕減當飭江漢關道岑春莫與之訂議由該領事電稟英國政府允爲擔保向英商匯豐銀行籌借英金七萬五千鎊按照時價折合漢口洋例銀五十

萬七千四十二兩二錢五分言明以鄂省川鹽江防加價錢文作抵常年四釐半起息分十年歸還由江漢關道繕給票據加蓋總督關防以昭憑信查鄂省所有鹽釐已於光緒二十四年分起儘數抵還部借洋款此項川鹽江防加價係奏明專供湖北槍礮廠經費本屬無可騰挪此次指項作抵不過聊資取信核計前項借款每年應還本銀五萬餘兩初年利銀一萬餘兩以後逐年遞減爲數尙不甚多容臣等另行籌款設法彌補奏明辦理於各項常年解款不致有妨

硃批該衙門知道欽此

購米運陝摺 光緒二十六年九月初九日

竊前欽奉寄諭現在近畿軍糧孔急海道梗阻亟宜設法接濟飭令漢黃德道岑春蓂速購米五十萬石趕緊分起北運聽候撥濟購價若干由該省籌墊隨後撥還等因欽此當卽督同藩司糧道會同江漢關道籌辦卽日墊款購買委員在於漢口及蕪湖鎮江並江北寶應縣之汎水鎮等處分投采買米十萬石運交清江轉運局道員惲祖祁接收轉解北上業經會同前湖北撫臣于蔭霖電奏聲明由鄂認購十萬石餘請各省合力采辦奉旨允准在案查前項采購軍米已陸續分儲鎮江

等處始因傳聞鑾輿西幸運道不定致有耽擱嗣正在兌交清江轉運間欽奉電旨現定閏八月初八日啟鑾西幸長安清江所設轉運總局著卽移至漢口等因欽此所有此項米石自應運回漢口統由惲祖祁經理從襄河運赴陝西以歸一律惟是買米墊款爲數甚鉅鄂省近年庫款奇絀歲入歲出之項皆可按籍而稽實無絲毫可以騰展欽奉諭旨隨後撥還茲臣督飭司道公同商酌擬在藩庫應解地丁京餉內劃撥銀十萬兩糧道庫應解光緒二十六年采買米石米價水腳運費項下劃撥銀七萬兩江漢關應解籌備餉需款內劃撥銀

十三萬兩俾還前墊之款其或盈或絀統俟事竣後核
實造報

硃批戶部知道欽此

宣布康黨逆迹並查拏自立會匪首片

光緒二十六年九月

初九日

再康黨謀逆創設自立會勾結兩湖三江會匪同時作亂當經拏獲匪首唐才常等多名正法派營四路勦捕飭令繳票解散其在逃各匪首咨行各省嚴拏業經於八月內奏陳在案其時准大學士李鴻章電稱致駐英使臣羅豐祿電云康梁布散黨徒暗結廣東著匪區新

三合會首潘新桂劉福等聯各省會匪約在兩湖三江兩廣起事名爲保國陰圖擾亂前月大通漢口唐才常等作亂事發經江鄂兩督嚴辦起獲軍械等據直認康黨不諱中外共知粵省亂黨尤多均在香港余育之花園澳門知新報館密謀拜會最著者有何連旺何林齡徐勤劉楨麟麥孟華陳宗儼容閎往來港澳勾結盜匪訂期起事槍礮由南洋用棺裝運入粵若不查辦有礙東南商務大局屬羅豐祿迅速密商英政府電飭新嘉坡香港總督嚴密查拏拘禁旋據羅豐祿電復稱已達外部允轉藩部電飭新嘉坡香港總督查辦至康逆潛

往漢口等處亦經電飭各該領事勿得收留各等語臣
查康梁逆黨奸謀逆蹟現已爲各國共見共聞惟查富
有票係用千字文編號就查獲親見者最前有地字號
最後者有職字號職字已有七百九十四號之票查職
字係第三百一十字是每字一千張合計已有三十一
萬張近據湖南拏獲唐才常之弟唐才中供稱上海刊
印富有票三十多萬分散夥黨招匪起事等語正與湖
北查獲逆票號數符合現在查獲呈繳者不及一萬張
其自行銷燬及未經散出者或亦有數萬張要之散在
民間者尙在二十萬張以外醜類實繁深爲可慮近由

湖南省郵政局搜獲逆信多件該匪黨深恨湖北發其奸謀誅其渠魁志在報復現又另遣悍匪攜帶重賞前來兩湖勾煽再圖大舉又聞廣東惠州府會匪作亂亦供係康黨所爲是此項匪徒逆謀未息後患方滋不可不嚴爲防遏惟有整頓各路防營嚴爲戒備不敢稍涉鬆懈現經臣查開最要匪首名單並摘敘自立會匪緊要情節曉諭地方告示稿暨另撰勸戒國會文分咨各出使大臣照會各國外部請其查照英國政府辦法電飭其本國駐華各口領事於所在租界遇有此等謀亂匪類勿得容留一面將告示稿勸戒國會文就外洋各

埠旅寓華商及外國文士之能通漢文者廣爲散布俾
曉然於該匪黨所爲實係悖逆凶殘專欲擾亂中外大
局所言中國之事皆係捏造謠言所勾結同夥作亂之
人皆係無賴會匪所有對各國人議論假託保國之詞
皆係狡詐欺人自不致爲其所愚仍飭駐洋各埠領事
官傳諭各華商切勿誤聽康梁邪說枉助贊財用以伐
狡謀而杜亂源並飭江漢關道照會漢滬各領事查照
辦理務期多殲渠魁解散黨羽以安大局

硃批知道了卽著電咨三江兩廣等省一體密訪嚴拏
殲厥渠魁解散黨羽務期淨絕根株以遏亂萌欽此

選撥槍礮解赴西安摺

光緒二十六年十月十八日

竊臣承准軍機大臣字寄奉上諭現在駐蹕西安護衛分防各軍需械甚多江南湖北兩廠快槍子彈尙能合用著劉坤一張之洞督飭局員加工趕造一面將現存槍械酌提若干迅派委員解赴行在以應急需等因欽此旋又奉寄諭岑春煊奏陝省募勇請飭撥槍械等語現在陝省添募勇營需械甚急著劉坤一張之洞於上海湖北各製造廠酌撥小口徑槍四千桿快礮十尊配齊子彈解赴西安俾資應用等因欽此查岑春煊所部舊有新招共二十餘營需械自必甚多此外在陝護衛

各軍亦必需械遵卽在於湖北槍礮廠選撥小口徑毛瑟快槍三千枝無煙藥槍彈五十萬顆洋製黑藥槍彈五十萬顆皮彈盒皮挂帶皮腰帶各三千副槍上備用撞鍼蟠簧退彈鉤各三百件三生七口徑快礮十六尊礮架十六副三生七快礮有銅殼之礮彈碰火各一千六百枚無銅殼之礮彈碰火各三千二百枚向係礮彈三枚共配銅殼一枚礮彈小銅火三千四百顆無煙礮藥三百二十五磅裝礮彈機器二副收口機器二副壓入礮彈小銅火機器二副又鄂廠創造前膛西門鋼車礮二十尊羣子彈二千枚獨子彈二千枚前膛槍銅帽

二百萬顆飭委分省補用道沈錫周湖北候補知縣楊
鼎福騎都尉盧雲湘解赴陝西並查照兩江督臣劉坤
一咨兩次奉旨遵解軍械統交陝西撫臣辦法令統交
陝西撫臣岑春煊衙門驗收應用如護衛各軍需械應
請旨飭下岑春煊酌撥應用

硃批著岑春煊統收隨時酌撥欽此

密陳槍礮廠情形片

光緒二十六年十月十八日

再查湖北槍礮廠常年經費不及滬局之半極形支絀
歷年添設罐鋼無煙藥等廠均係輒轉借墊積欠甚鉅
其製造快槍彈快礮彈各銅殼碰火機器裝藥機器均

以無款未能增添雖晝夜併工所出子彈不能敷所製
槍礮之用此項小口快槍及快礮本應均用無煙藥因
經費久竭物料不能豫儲近日廠甫造成向外洋訂購
藥料尙難運到是以一時未能開造兩種無煙藥五月
後外洋禁售設法勉向滬局商購萬餘磅密運來鄂加
工趕造槍彈旋經滬局以留備自用不能再售入夏以
來撥解神機營虎神營武衛先鋒左軍提督張春發軍
及山西撫臣錫良軍鄂省所派北上方友升軍爲數已
及一百六十餘萬之多且卽製有彈殼而一一裝藥料
安底火機器旣少徒恃人工亦苦趕辦不及以致湖北

本省各防營所發快槍均乏藥彈萬一有事各營均同
徒手萬分焦急加以山西撫臣錫良電催續撥錫軍方
軍槍彈河南撫臣于蔭霖又撥解豫軍槍礮彈數均甚
鉅臣乃督飭員弁匠目多方思索考究將槍彈改裝洋
製黑藥而黑藥初試放時動輒挂腔阻塞兩月有餘乃
思得其法去其彈頭鋼皮於銅殼內加墊蠟餅並將鉛
箭改小一絲藥力加增放時始無滯塞屢經臣親加考
校其擊力遠近所差尙不甚遠故此次所解槍彈以無
煙藥及洋製黑藥分半搭配勉應目前之急此係外洋
購來黑藥及鄂省新仿西式精造黑藥方能合用若尋

常土造黑藥仍不能用惟長江時有外國兵船游弋屢次聲言斷我接濟加以湘鄂兩省富有票匪蔓延甚廣防不勝防所有各營槍礮必須趕緊配足藥彈方足以資操練而備不虞近日情形日緊本月初七日上海領事并禁各洋行將製造軍火之物料出售此後製槍礮彈殼之上等洋銅製槍礮機簧零件之上等洋銅槍彈頭之洋鋼皮製槍彈夾之洋銅片均屬無從購覓惟有儘現有物料製造應用再解赴北路之軍械最爲洋人所忌各國水師提督領事嘖有煩言現係作爲解赴襄陽防營軍火先行密運至襄存儲再委員由襄解陝所

有彈藥艱難及物料缺乏並密儲轉運情形謹附片密
陳伏祈聖鑒

硃批知道了欽此

張文襄公全集卷五十一終

新城王樹樸校